

# Recueil des chartes de l'abbaye de Stavelot-Malmedy, 179

LUCIUS EPISCOPUS SERVUS SERVORUM DIE DILECTIS FILIIS WIBALDO STABULENSI ABBATI EJUSQUE FRATRIBUS TAM PRESENTIBUS QUAM FUTURIS REGULARIAM VITAM PROFESSIS IN PERPETUUM. Apostolici moderaminis clementiae convenit religiosos diligere et eorum loca pia protectione munire. Dignum mamque et honestati conveniens esse cognoscitur, ut qui ad ecclesiarum regimen assumpti sumus, eas et a pravorum hominum nequitia tueamur et apostolicae sedis patrocinio foveamus. Eapropter, dilecte in Domino fili WIBOLDE abbas, tuis justis postulationibus debita benignitate gratum impartientes assensum, Stabulense monasterium, cui, Deo auctore, preesse dinosceris, ad exemplar predecessoris nostri bone memoriae pape Caelestini, sub beati Petri et nostra protectione suscipimus et presentis scripti privilegio communimus; statuentes ut quascumque possessiones, quaecumque bona idem monasterium in presentiarum juste et canonice possidet aut in futurum concessione pontificum, largitione regum vel principum, oblatione fidelium seu aliis justis modis, Deo propitio, poterit adipisci, firma vobis vestrisque successoribus et illibata permaneant. In quibus haec propriis duximus exprimenda vocabulis : Malmundarium videlicet, quod sicut ab initio foundationis suae fuisse dinoscitur, semper subditum sit Stabulensi loco quemadmodum cella monasterio, monachi vero ipsius loci Stabulaus professionem faciant, et ubi abbas providerit benedicantur et ordinentur, nec pro eodem loco Stabulensis abbas, qui pro tempore fuerit, cogatur Coloniensi archiepiscopo obedientiam promittere vel animarum curam ab ipso suscipere; castellum quod Longia vocatur, prohibentes quod nullus advocatus ibi aliquid sibi usurpare presumat, sed in dispositione abbatis omni tempore permaneat; ecclesiam in Sprimont, in Heirait, in Turninnes in Hosinmont, in Oseis, in Graisde, in Aldendorph, in Amblaua, in Tumbis, in Clotena; villam Germiniacum et duo molendina super fiuvium Suppam, villam Turuiues, villam Sprimont, Lukesenges, Vilippes, Tauernou, Hussenebach quam dedit vobis liber homo Godefridus, villam Bacen. Ordinationes autem ecclesiarum et decimationes earum sicut hactenus habuistis vobis nichilominus confirmamus, statuentes ut in parochialibus ecclesiis quas tenetis nullus episcopus absque abbatis assensu presbyterum collocet, sed juxta decretum predecessoris nostri bonae memoriae pape URBANI, episcopi parochiae curam cum abbatis consensu sacerdote committant, ut ejusmodi sacerdotes de plebis quidem cura episcopo rationem reddant, abbati vero pro rebus temporalibus ad monasterium pertinentibus debitam subjectionem exhibeant. Prohibemus quoque ut in possessionibus ipsius monasterii nullus juariam vel maioriam aut villicationem hereditario seu faeodi jure per successionem teneant, sed in potestate abbatis sit ordinare et cum oportunitate cognoverit immutare; securitatem etiam et libertatem in circuitu ipsius monasterii infra leugam, sicut a regibus sive imperatoribus rationabili providentia concessum est, nullus presumat infringere. Idem vero monasterium tertium advocatum non habeat, sed juxta antiquam consuetudinem II tantum, quorum primus advocatiam cum banno de manu regum vel imperatorum accipiat, alter autem qui de manu primi advocati beneficium acceperit, bannum a regibus vel imperatoribus accipiat; nec liceat eis in possessionibus vel personis monasterio pertinentibus hospitia, placita, precarias, exactiones facere, non palefridos tollere, non freda, non redibitiones, non consuetudines quae mortuae manus vulgo appellantur exigere, sed sicut in scriptis regum vel imperatorum continetur ad jus et ordinationem abbatis pertineant. Ministeriales autem, cum ad festa monasterii convenerint, nullum servitium aut

pastum exigat, nisi quantum abbas rationabiliter eis providerit inpendendum. Addentes etiam auctoritate apostolica interdiximus, ut abbatia ipsa nulli in beneficium vel concambium detur, nec a laico unquam regatur, nec liceat abbati qui pro tempore fuerit possessiones vel bona ipsius in feodum vel in pignus alicui dare, nec ullam prorsus commutationem vel quamlibet alienationem absque communi capituli consilio exinde facere. Obeunte vero te nunc ejusdem loci abbate vel tuorum quolibet successorum, nullus ibi qualibet surreptionis astutia vel violentia preponatur, set liceat vobis communi consilio vel partis consilii sanioris secundum Dei timorem et beati Benedicti regulam absque ullius contradictione abbatem eligere. Chrisma quidem, oleum sanctum, consecrationes altarium seu basilicarum, abbatis benedictionem et monachorum ordinationem, qui ad sacros ordines fuerint promovendi, a diocesano suscipiatis episcopo, si quidem catholicus fuerit et gratiam atque communionem sedis apostolicae habuerit, et ea gratis et absque aliqua pravitate vobis voluerit exhibere, alioquin liceat vobis catholicum quemcumque malueritis adire antistitem, qui nimirum nostra fultus auctoritate quod postulatur indulgeat. Porro abbas qui pro tempore eidem loco pre fuerit ad nullius nisi diocesani episcopi synodum ire cogatur. Presbiteri autem sive clerici qui in vestris ecclesiis deserviunt debita et consueta vobis servitia absque ulla contradictione persolvant. Sepulturam quoque ipsius loci liberam esse concedimus, ut quicumque se illic sepeliri deliberaverint, nisi forte excommunicati sint, nullus obsistat, salva tamen justitia matricis ecclesiae. Decernimus ergo ut nulli omnino hominum liceat prefatum monasterium temere perturbare aut ejus possessiones auferre vel ablatas retinere, minuere, aut aliquibus vexationibus fatigare, sed omnia integra conserventur, eorum pro quorum gubernatione et sustentatione concessa sunt usibus omnimodis profutura, salva sedis apostolicae auctoritate et diocesani episcopi canonica libertatis justitia. Si qua igitur infuturum aecclesiastica secularisvae persona hanc nostrae constitutionis paginam sciens contra eam temere venire temptaverit, secundo tertiove commonita, si non satisfactione congrua emendaverit, potestatis honorisque sui dignitate careat reamque se divino iudicio existere de perpetrata iniquitate cognoscat et a sacratissimo corpore ac sanguine Dei et Domini redemptoris nostri Jesu Christi aliena fiat atque in extremo examine districte ultioni subjaceat. Cunctis autem eidem loco justa servantibus sit pax Domini nostri Jesu Christi; quatinus et hic fructum bonae actionis percipiant et apud districtum iudicem praemia aeternae pacis inveniant. AMEN. AMEN. AMEN.

(L. R.) Ego Lucius catholicae ecclesiae episcopus ss. (L. M.)

- + Ego Conradus Sabinensis episcopus ss.
- + Ego Theodewinus sanctae Rufinae episcopus ss.
- + Ego Petrus Albanensis episcopus ss.
- + Ego Gregorius presbyter cardinalis titulo Calixti ss.
- + Ego Giselbertus presbyter cardinalis sancte titulo sancti Marci ss.
- + Ego Ubaldus presbyter cardinalos sancte Crucis titulo ss.
- + Ego Hugo sancte Romane ecclesie presbyter titulo sancti Laurentii in Lucina ss
- + Ego Gregorius diaconus cardinalis sanctorum Sergii et Bacchi ss.
- + Ego Guido diaconus cardinalis sanctorum Cosmae et Damiani ss.
- + Ego Octavianus diaconus cardinalis sancti Nicholai in carcere Tulliano.

+ Ego Guido in Romana ecclesia altaris minister indignus ss.

+ Ego Petrus diaconus cardinalis sancte Marie in Porticu ss.

+ Ego Gregorius diaconus cardinalis sancti Angeli ss.

+ Ego Johannes diaconus cardinalis sancte Marie nove ss.

+ Ego Berardus diaconus cardinalis sanctae Romanae ecclesiae ss.

Datum Laterani per manum BARONIS sanctae Romanae ecclesiae subdiaconi IIII idus novembris, indictione VIII, incarnationis dominicae anno M° C° XL° IIII°, pontificatus vero domni LUCII SECUNDI pape anno primo.